



内閣文庫	
番號	漢 1882
冊數	5 ( 3 )
函號	300 201

三〇〇  
一九五



醫說卷第五

大學東

校典籍

宋新安張氏集

○心疾健忘

抑情順理

燕居暇日何所用心善養形神周防衆患常存敬  
畏無失調將食飲之間最為急務安危所繫智力  
可分與其畏病而求醫孰若明理以自求與其言  
病而治以藥孰若抑情而預治情斯可抑理亦漸  
明能任理而不任情則所養可謂善者矣防患却  
疾之要其在茲乎

○心疾

韋緩李蟠俱以心疾廢韋嘗疑過智井而飲李蓋

海山醫局

同治

少而多疑病心亦心疾也。心為府也。為外物所中。終身不痊。多思慮多疑惑疾之本也。出國史補

○驚氣入心

治驚氣入心。絡暗不能語。密陀僧研細服。一七許。茶調服。遂愈。有人因伐薪山間。為狼所逐。而得是疾。或授以此方。亦驗。又一軍校採藤於谷。逢惡蛇。而病其狀正同。亦用此藥療之。而愈。出已志

○神志恍惚

韓宋武侍父官洋州。得異疾。與神佛遇。頗不省人事。神志恍惚。或食或不食。國醫陳易簡教服蘇合香丸。後數月。所遇者忽不至。

○神氣不寧

明州董生患神氣不寧。每卧覺身在床。而神離體。驚悸多端。通夕無寢。許為診視。詢諸醫。作何證。曰：心疾也。許曰：是肝經受邪。非心病也。肝藏魂者也。游魂為變。平人肝不受邪。故魂宿於肝。神靜而得寧。今肝經因虛邪氣襲。魂不歸舍。是以卧則揚揚若去體。肝主怒。故小怒輒劇。董喜曰：前此未之聞。雖未服藥。已覺沉痾去體矣。愿求藥法。許曰：君且持此說。與眾醫議。所治之方。而徐質之閱。旬日復至。云醫徧議。古今方書。無與病相對。許無乃為處大珠丸。獨活湯。二方以贈服。一月而病悉除。其方以大體珠為君。龍齒佐之。珠入肝經。為第一。龍齒與肝同類。故也。龍齒虎精。今人例作鎮心藥。而不

知龍齒安魂虎睛定魄各言其類也龍能變化故魂游而不定虎能專靜故魄止而有守當隨其宜而治之方載本第一卷

健忘詩

治心氣不足健忘詩云桂遠人三四天嘗地亦同茯苓加一倍日誦萬言通迺官桂遠志人參巴戟天芎藭地骨皮出瑣錄

忽不識字

松滋令姜愚無他疾忽不識字數年方稍稍復舊

出單談

治人心昏塞多忘喜誤

七月七日取蜘蛛網著衣領中勿令人知本出

草

治惡夢

錢不步卿忽夜多惡夢但就枕便成輒通夕不止後因赴官經漢上與鄧州推官胡用之相遇驛中同宿遂說近日多夢慮非吉兆胡曰某嘗如此驚怕特甚有道士教戴丹砂初任辰州推官求得靈砂雙箭鏃者戴之不涉旬即驗四五年不復有夢至今秘惜因解髻中以一紗袋遺之即夕無夢神魂安靜真誥及他道書多載丹砂辟惡豈不信然

出類編

麝枕

置麝枕中可絕惡夢出物類相感志

癲疾

素問曰人生而病癲疾者安得知之岐伯曰病名為胎病此得之在母腹中時其母有所大驚氣上而不下精氣并居故令子發為癲疾也出太平御覽

又

癲狂之疾何以別答曰狂之始發少卧少饑自賢自貴妄笑好樂癲者精神不守言語錯亂甚則登高罵詈或至狂走癩者發則仆地嚼舌吐沫手足搐搦或作六畜之聲頃刻則蘇癩者邪入於陰經一曰陽併則狂癩者邪干於心其處方用藥亦皆相類

狂

凡人患癲狂叫喚打人者皆心經有熱當用鎮心藥當大黃與之瀉數日然後服安神及風藥但得寧靜即是安樂不可見其瘦弱減食便以溫藥補之病必再作戒之戒之緩緩調飲食可也

魘不寤

人眠倒視魄外遊為邪鬼所魘屈其精神弱者魘則久不得寤乃至氣絕所以須傍人助喚并以方術治之低聲遠喚即活

夢

陰盛則夢涉大水恐懼陽盛則夢大火燔灼陰陽俱盛則夢相殺毀傷上盛則夢飛下盛則夢墮飽則夢與饑則夢食取肝氣盛則夢怒肺氣盛則夢

哭

○卧而不寐

老人卧而不寐少壮寐而不寤何也少壮者血氣盛肌肉滑氣道通榮衛之行不失於常故晝日精夜不寤也老人血氣衰肌肉不滑榮衛之道澆故晝日不能精夜不得寐也

○小便如泔

一男子小便日放十次如稠米泔色赤白心神恍惚瘦瘁食減以女勞得之服桑螵蛸散未終劑而愈安神魂定心志治健忘小便數補心氣桑螵蛸遠志菖蒲龍骨人參茯苓神當歸龜甲醋炙以上各一兩為末每服二錢夜卧入參湯調出本草衍義

○夜魘

夜魘之人急取梁上塵納鼻中即醒戒勿以燈照之出瑣錄

○暮卧呪

道林曰暮卧以手撫心上呪曰天靈至榮願得長生五龍君侯願得安寧男一七遍女二七遍長生不病出修真秘訣

○桑葉止汗

巖州山寺有僧形體羸瘦飲食甚少每夜就枕遍身出汗迨旦衣服皆透濕如此二十年無復可療唯待盡耳監僧曰吾有藥絕驗為汝治之三日宿疾頓愈遂併授以方乃單用桑葉一味乘露採摘

控焙乾碾為末。二錢空腹溫米飲調。或值桑落乾者亦堪用。但力不如熟者。按本草亦載桑葉主盜汗。其說可證。出唐志

○大驚發狂

許叔微本事方云軍中有一人犯法褫衣將受刃得釋神失如癡。予與驚氣丸一粒服訖而寐。及覺病已失矣。江東張提轄妻因遇寇失心已數年。予授其方隨愈。又黃山沃巡檢妻狂厥踰年更十餘醫而不驗。予授其方去附子加鐵粉亦不終劑而愈。鐵粉非但化涎鎮心。至如摧抑肝邪特異。若多恚怒肝邪太盛。鐵粉能制伏之。素問言陽厥狂怒以鐵粉落飲金制木之意也。

○犯麥毒

齊州有人病狂每歌曰。五靈華蓋曉玲瓏。天府由來汝腑中。惆悵此情言不盡。一丸蘿蔔火吾宮。又曰踏陽春。人間二月雨和塵。陽春踏盡秋風起。腸斷人間白髮人。後遇一道士作法治之。乃云夢中見一紅裳少女引入宮殿。皆紅紫飾。小姑令歌。道士曰此正犯大麥毒。女則心神。小姑脾神也。按醫經蘿蔔治麵毒。故曰火吾宮。即以藥并蘿蔔食之。遂驗。出洞微志

○夢遺

有人夢遺精。初有所見。後來雖夢中亦見。日夜不拘。常常遺漏。作心疾。不足服心氣藥。無驗。作腎氣

虛補腎藥亦無驗。醫問患者覺腦冷否。應之曰：只為腦冷，服驅寒散遂安。蓋腦者諸陽之會，髓之海。腦冷則髓不固，是以遺漏也。有此疾者，先去腦中風冷，腦氣冲和，無服益心腎藥，無不愈者。

○心脉溢關

王叔和脉訣論曰：溢關必骨痛心煩燥。通真子解云：心脉盛而溢關，則筋緊而骨束，是以骨痛。師曰：筋緊有筋攣之疾，豈得骨痛。所以心脉盛而骨痛者，心屬火，骨屬腎水。心脉溢關，則水不勝火，煎熬得骨痛，非筋緊也。出醫餘同上

○瘖

黃帝問曰：人有重身九月而瘖，此為何也。岐伯對

曰：胞絡者繫於腎，少陰之脉貫腎繫舌本，故不能言。帝曰：治之奈何。岐伯曰：無治也。當十月復。

○人卧血歸於肝

人卧血歸於肝，宣布於肺，隨氣運行，灌溉一身。耳受血而能聽，目受血而能視，足受血而能步，掌受血而能握，指受血而能攝，臟受血而能液，腑受血而能氣。是以出入升降濡潤宣通者，由此使然也。

○血脉

脉者血之府，脉虛則血虛。

○笑歌狂疾

開元中有名醫紀朋者，觀人顏色談笑，知病深淺，不待診脉。帝聞之，召於掖庭中，看一宮人，每日是



則歌笑啼號若狂疾而是不能履地朋視之曰此必因食飽而大促力頓仆地而就乃飲以雲母湯令熟寐覺而失所苦問之乃言因太華公主壽誕宮中大陳歌吹某乃主謳懼其聲不能清且長喫純蹄羹飽而當筵歌大曲曲罷覺胃中熱甚於砌臺上高而墮下久而方甦病狂之不能步也

出明醫錄

○ 鬲噎諸氣

氣鬲

齊主中子諸嬰兒小子病召臣意診切其脉告曰氣鬲病病使人煩憊食不下時嘔沫病得之少憂數忤食飲意即為之作下氣湯以飲之一日氣下二日能食三日即病差所以知小子之病者診其

邊失振而倒漢書  
陽醉邊地

脉心氣也。經躁而濁也。此陽絡病也。脉法曰脉來數疾去難而不一者病主在心。周身熱脉盛者為重陽也。重陽者邊音唐心主故煩懣食不下則絡脉有過。絡脉有過則血上出。血上出死。此悲心所生也。病得之憂也。出史記

○ 五鬲

古今論鬲氣乃有五種。謂憂鬲。悲鬲。氣鬲。寒鬲。熱鬲也。夫胃中氣結煩悶飲食不下羸瘦無力此乃憂鬲。心下實滿食不消化噫輒錯心大小便不利此名悲鬲。胃脇逆滿咽喉閉塞噫開食臭此名氣鬲。心腹脹滿欬逆腸鳴食不生肌此名寒鬲。主心中熱口舌生瘡骨煩體重唇乾口燥背痛心胃痺

此名熱鬲

五鬲緒氣

婦人多有此疾

此病不在外不在內不屬冷不屬熱不是實不是虛所以藥難取效此病緣憂思恚怒動氣傷神氣積於內則諸惡證見氣靜疾候稍平捫之而不得疾自視之而不知色之所因耳聽之而不知音之所發故鍼灸服藥皆不獲效此乃神思間病也須京師一士人家有此證勸令靜觀內外將一切用心力事委之他人服藥方得見效恐卒不能安但依此戒之灼艾膏肓與四穴及服此三藥可以必瘥孫真人云婦人嗜慾多於丈夫感病倍於男子加以慈戀愛憎疾妬憂恚染著堅牢情不自抑所

以病根為深療之難差

五噎

噎病亦有五種氣噎憂噎食噎勞噎思噎噎者噎塞不通心胃不利飲食不下也各隨其症而治之也

靛治噎病

廣五行記治噎疾永徽中絳州有僧病噎數年臨死遺言令破喉視之得一物似魚而有頭徧體悉是肉鱗致鉢中跳躍不止以諸藥味投鉢中藥即悉化為水時寺中方刈藍作靛試取少靛致鉢中此蟲遶鉢畏遊須臾化為水世人以靛治噎疾方

糠治卒噎

春杵頭細糠治卒噎。陶隱居云倉卒噎不下刮取  
含之即去。亦是春擣義爾。天下事理多有相影響  
如此也。用華子云平治噎煎湯呷。出本草

○病噎吐蛇

華陀行道見一人病噎嗜食而不得下。家人車載  
欲往就醫。陀聞其呻吟駐車往視語之曰。向來道  
傍有賣餅家蒜齏大酢從取三升飲之病自當差。  
即如陀言立吐蛇一條懸之車邊欲造陀。陀尚未  
還。陀家小兒戲門前逆見自相謂曰。客車邊有物  
必是逢我公也。疾者前入見陀辟北懸此蛇輩以  
十數。出太平御覽

○食飴治噎

吳廷紹為太醫令烈祖因食飴喉中噎。國醫皆莫  
能愈。廷紹尚未知名。進楮實湯一服疾失去。羣醫  
默識之。他日取用皆不驗。或扣之答曰噎。因甘起  
故以楮實湯治之。出南唐書

○百病生於氣

百病生於氣。怒則氣上。喜則氣緩。悲則氣消。恐則  
氣下。寒則氣收。炆則氣泄。驚則氣亂。勞則氣耗。思  
則氣結。九氣不同。何病之生。

○天地氣所生

天地之數起於上而終於下。歲半之前天氣主之。  
歲半之後地氣主之。上下交互氣交主之。歲紀畢  
矣。

○氣虛氣逆

邪氣盛則逆。精氣奪則虛。氣虛者肺虛也。氣逆者  
足寒也。非其時則生。當其時則死。餘皆如此。

○有餘不足

神有餘有不足。氣有餘有不足。血有餘有不足。形  
有餘有不足。志有餘有不足。凡此十者。其氣不等。

○重虛

脈氣上虛尺虛。是謂重虛。

○寒熱厥

陽氣衰於下則為寒厥。陰氣衰於下則為熱厥。

○氣候

五日謂之候。五候謂之氣。六氣謂之時。四時謂之

歲。

○六氣

天氣通於肺。地氣通於嗌。風氣通於肝。雷氣通於  
心。谷氣通於脾。雨氣通於腎。腸胃為海。九竅為水  
注之氣。

○胃氣五臟之本

五臟皆稟氣於胃。胃者五臟之本。臟氣不能自致  
於手太陰。必因胃氣。

○四時五行五臟五氣

天有四時五行生長收藏以應寒暑燥濕風。人有  
五臟化五氣以生喜怒憂悲恐。故喜怒傷氣。寒暑  
傷形。暴怒傷陰。暴喜傷陽。

○旦暮氣

平旦人氣生。日中陽氣隆。日西陽已虛。氣門已閉。是故暮而收。拒無擾。筋骨無見。霧露反此。三時形乃困薄。

○四時之氣更傷五臟

春傷於風。邪氣留連。乃為洞泄。木勝脾土。故也。夏傷於暑。發為瘧疾。秋傷於濕。上逆而效。發為痿厥。冬傷於寒。春必發溫病。四時之氣更傷五臟。

○五臟所藏

心臟神。肺臟魄。肝臟魂。脾臟意。腎臟志。是謂五臟所藏。

○五臟所傷

久視傷血。久卧傷氣。久坐傷肉。久立傷骨。久行傷筋。是謂五臟所傷。

○五臟之脉

肝脉弦。心脉鉤。脾脉毛。肺脉浮。腎脉石。是謂五臟之脉。

○五入

酸入肝。辛入肺。苦入心。鹹入腎。甘入脾。是謂五臟所入。

○五惡

心惡熱。肺惡寒。肝惡風。脾惡濕。腎惡燥。是謂五惡。

○五液

五臟化液。心為汗。肝為淚。肺為涕。脾為涎。腎為唾。

是謂五液

○五主

心主脉。肺主皮。肝主筋。脾主肉。腎主骨。是謂五主。

○五禁

辛走氣。氣病無多食辛。鹹走血。血病無多食鹹。苦走骨。骨病無多食苦。甘走肉。肉病無多食甘。酸走筋。筋病無多食酸。是謂五禁。

○汗出

飲食飽甚。汗出於胃。驚而奪精。汗出於心。持重遠行。汗出於腎。疾走恐懼。汗出於肝。搖體勞苦。汗出於脾。

○體有可已之疾

孫思邈居太白山於推步醫藥無不善。盧照隣有疾不可為而問曰：高醫愈疾柰何？答曰：天有四時五行，寒暑迭居，和為雨，怒為風，凝為霜，雪。張為虹蜺。天常數也。人之四肢五臟一覺而一寐，吐納往來流為榮衛，張為氣色，發為音聲，人常數也。陽用其形，陰用其精，天人所同也。失則蒸生熱，否生寒，結為瘤贅，陷為癰疽，奔則喘乏，竭則焦槁，發乎面動乎形。天地亦然。五緯縮盈，孛彗飛流，其災沴也。寒暑不時，蒸否也。石立土坼，是其贅疣。山崩土陷，是其癰疽。奔風暴雨，是其喘乏。川瀆竭涸，是其焦槁。高醫導以藥石，投以砭劑。聖人和以至德，輔以入事故，體有可已之疾。天有可救之災。書出唐

消渴

渴服八味丸

丹金云消渴病所忌者三。一飲酒。二房室。三鹹食。及麪能忌此雖不服藥亦自可。消渴之人常須慮患大癘必於骨節間忽發癘疽而卒。予親見友人邵仕道患渴數年果以癘疽而死。唐祠部李郎中論消渴者腎虛所致每發則小便甜。醫者多不知其疾。故古今亦闕而不言。淋範言稼穡作甘以物理推之淋錫醋酒作脯法須臾即皆能甜也。是人食之後滋味皆甜流在膀胱。若腎氣盛是為真火上蒸脾胃變化飲食分流水穀從二陰出精氣入骨髓合榮衛行血脉榮養一身。其次以為脂膏

其次以為血肉也。其餘則為小便故小便色黃血之餘也。臊氣者五臟之氣鹹潤者則下味也。腰腎既虛冷則不能蒸於穀氣盡下為小便故味甘不變其氣色清冷則肌膚枯槁也。由如乳母穀氣上湛皆為乳汁。消渴病者下湛為小便皆精不實於內則小便數澀溺也。又肺為五臟華蓋若下有燬氣蒸則肺潤若下極冷則陽氣不能升故肺乾即渴。易於否卦乾上坤下陽無陰而不降陰無陽而不升上下不交故成否也。譬如釜中有水以火煖之其釜若板覆則燬氣上騰故板能潤也。若無火力水氣則不能上。此板則終不能潤也。火力者則是腰腎強盛也。常須煖補腎氣飲食得火力則潤

上而易消亦免乾渴也。故張仲景云宜服腎氣丸。味丸此病與脚氣雖同為腎虛所致。其脚氣始發於二三月盛於五六月衰於七八月。凡消渴始發於七八月盛於十一月十二月衰於二月三月其故何也。夫脚氣壅疾也。消渴宣疾也。春夏陽氣上故壅疾發則宣疾愈。秋冬陽氣下故宣疾發則壅疾愈也。審此二者疾可理也。猶如善為政者寬以濟猛。猛以濟寬。隨事制度。爾仲景云是太陽者膀胱之經也。膀胱者腎之府。小便數此為氣盛。氣盛則消穀大便硬。衰則為消渴也。男子消渴飲一斗小便亦得一斗。宜八味腎氣丸。出本方

又

眉山有楊穎臣者長七尺健飲啖侗人也。忽得消渴疾日飲水數斗食常倍而數溺。消渴藥服之逾年疾日甚自度必死。治棺衾屬其子於人。蜀有良醫張肱隱之子不記其名為診脈笑曰君幾誤死矣。取麝香當門子以酒浸之作十許丸取枳椇子為湯飲之遂愈。問其故張生曰消渴中皆脾衰而腎敗。土不能勝水腎液不上沚乃成此疾。今診穎臣脾脈極。臣脈熱而腎不衰當由果實與酒過度虛熱在脾故飲酒兼入而多飲水尤多不得不多溺也。非消渴也。麝香能敗為瓜果近輒不結而枳椇亦能勝酒。屋外有此木屋中釀酒不熟以其木為屋其下亦不可釀酒。故以二物為藥以去酒



果之毒。宋玉云：枳枸來巢，以其實如鳥乳，故能來巢。今俗訛謂之鷄矩子，亦謂之癩漢指頭。蓋取其似也。嚼之如牛乳，小兒喜食之。出大

又

昔有仕宦患消渴，醫者謂其不過三十日死。棄官而歸，半途遇一醫人，令急遣人致北梨二担，食盡仕宦如其言得之，方渴即食，未及三十枚而病止。

○仲景治渴

提點鑄錢朝奉郎黃涉，久病渴極疲瘁，予每見必勸服八味丸，初不甚信，後累醫不痊，漫服數兩遂安。或問渴而以八味丸治之何也？對曰：漢武帝渴，張仲景為處此方，蓋渴多是腎之真水不足，致藏

若其勢未至於消，但進此劑殊佳。且藥性溫平，無

害也。

出泊宅編

○浮石止渴

交州記曰：浮石體虛而輕，煮飲止渴。

○苦酒消渴

下蘭苦酒消渴時，魏明帝信巫女用水，方使人持水賜蘭，蘭不肯飲，詔問其意，蘭言治病自當以方藥，何信於此？帝為變色，而蘭終不服。出三國志

○熱中消中富貴人

多飲數溲曰熱中，多食數溲曰消中，多喜曰癩，多怒曰狂，熱中消中皆富貴人也。

○心腹痛淋附

心痛

心藏神。心者身之本也。其正經為風邪所乘。名真心痛。旦發夕死。夕發旦死。心有包絡脉。是心之別脈。為風冷所乘。亦令心痛。狀乍輕乍重。盛不至於死。又手少陰心之經。其氣逆。謂之陽虛陰厥。亦令心痛。其痛引喉是也。其心下急痛。名脾心痛。腹脹而心痛。名胃心痛。下重而苦泄。寒中為腎心痛。又有九種心痛。一蟲二疰三風四悸五食六飲七冷八熱九去從來。此皆邪氣在乘於手少陰之絡。邪氣搏於正氣。邪正相擊。故令心痛。診其心脉急者為痛。引背食不下。寸口脉沉緊。苦心下寒時痛。關上脉緊。心下苦痛。左手脉沉。則心痛為陰陽絕者。

無心脉也。苦心下痛。

出鷄峯方

腹痛有數種

有人患腹痛。其狀不一。有風熱痛。有冷痛。有冷積痛。有氣積痛。有食積痛。有蟲痛。有婦人經脉行而先腹痛者。有小兒瘡疹出而先腹痛者。腹虛滿服煖藥無效者。此風痛也。宜服官局胃風湯。火欬草丸。如附子烏頭之類。大便秘結小便赤而喜冷飲食者。此熱痛也。後生宜四順飲。子老人宜服大麻仁丸。皆用甘有塊起而腹痛者。積也。冷積則面無色。瘦瘁脉沉伏。宜於煖藥中用巴豆。如官局積氣丸之類。氣積多煖氣。宜服嘉禾散。調氣散。五鬲寬中散。如丁香茴香木香沉香之類。食積則多噫酸。

出清水惡心宜服京三稜蓬莪朮乾漆之類亦須  
兼巴豆至於腹中有塊起急以手按之便不見三  
更心嘈牙關強硬惡心而清水出及夢中齧齒者  
此謂之蟲痛宜服官局方化蟲丸如史君子之類  
又有室女婦八月經行先腹痛此特與諸痛不同  
只可服四物湯小兒身熱足冷耳及尻骨冷及眼  
澁者皆瘡疹候必先腹痛蓋疹子先是腸胃中出  
狀後發於外且服葛根升麻湯及綿煎散之類舒  
平解痛字云宜通而塞則為痛此極有理凡痛須  
通利臟腑乃能隨其冷熱而須用巴豆大黃牽牛  
此最要法出醫餘

○大瀉腹痛

有人每日早起須大瀉一行或時腹痛或不痛空  
心服熱藥亦無效後有智者察其故令於晚食前  
更進熱藥遂安如此常服竟無恙蓋煖藥雖平旦  
空腹至晚藥力已過一夜陰氣何以敵之於晚間  
再進熱藥則一夜煖藥在腹遂可以服陰氣丸治  
疹疾皆如此

○暑月破腹

一曰傷暑二曰傷冷物食瓜果飲水之類三曰夏  
季心火旺心經熱則小水不利行大腸謂之水穀  
不分傷暑而瀉者心燥頭痛作渴宜服香薷飲烏  
金散傷冷物而得者腹痛水泄穀食不化宜服煖  
藥如附子及理中丸二氣丹正元紫蘇丸之類水

穀不分者宜服大順散五苓散二藥專分清濁暑  
月多此疾故人多用之凡破腹不可急以熱藥止  
之恐成痢

○小腹切痛

治胃氣小腹切痛元豐中丞相王郕公小腹痛不  
止宣差太醫攻治備至皆不效凡藥至熱如附子  
硫黃五夜叉丸之類用之亦不差駙馬張都尉令  
取婦人油頭髮燒如灰細研篩過溫酒調二錢即  
時痛止

○真心痛

頭心之病有厥痛有真痛手三陽之脉受風寒則  
名厥頭痛入連腦者名真頭痛其五臟氣相干名

厥心痛其痛甚但在心手足青者名真心痛其真  
心痛者旦發夕死夕發旦死

○脾痛

張思順盛夏調官都城苦熱食冰雪過多又飲木  
瓜漿積冷于中遂感脾疼之疾藥不釋口殊無退  
證累歲日齋道人適一道人曰我受官人供固非  
所惜但取漢椒二十一粒浸於漿水盃中一宿漉  
出還以漿水吞之若是而已張如所戒明日椒纔  
下腹即脫然更不復作

○冰煎理中丸

泗州楊吉老名醫也徽廟嘗苦脾疾國醫進藥俱  
不效遂召吉老診視訖進藥徽廟問何藥吉老對

以大理中丸。上云朕服之屢矣。不驗。吉老曰所進湯使不同。陛下之疾以食冰太過得之。今臣以冰藥煎此藥欲已受病之原果一二服而瘳。出錄

○心痛食地黃麩

崔无亮海上女治一切心痛無問久新以生地黃一味隨人所食多少擣取汁搜麩作餅。或作冷淘良。又當利出蟲長一尺許頭似守宮後不復患。劉禹錫傳信方貞元十年通事舍人崔抗女患心痛垂氣絕遂作冷地黃淘食之便吐一物方可一寸以來如蝦蟆狀無目足等微似有口。蓋為此物所食自此頓愈。麩中忌用鹽。出本方

○膀胱氣痛

歙縣尉宋荀甫膀胱氣作痛不可忍。醫者以剛劑與之痛愈甚。洩溺不通三日。許學士視脈曰投熱藥太過。適有五蒼散一兩分為三易其名用連鬚葱一莖茴香及鹽少許水一盞守煎七分連服之中夜下小便如墨汁一二升臍下寬得睡明日脉已平。續用硃砂丸數日愈。蓋是疾本因虛得不宜驟進補藥。邪之所湊其氣必虛留而不去其病則實故先滌所蓄之邪然後補之。出本方

○沙石淋

鄞縣尉耿夢得妻苦沙石淋十三年。每溺時器中剝剝有聲痛楚不堪。即令採虎杖根俗呼為土牛膝者淨洗碎之。凡一合用水五盞煎耗其四而留

其一去滓以對乳香末少許研調服之一夕愈上同

○頭垢治淋

頭垢主淋閉不通。又主噎亦治勞復出本草

○諸瘧

瘧名不同

病者發寒熱一歲之間長幼相若。染時行變成寒熱名曰疫瘧。寒熱日作夢寐不祥多生恐怖名曰鬼瘧。宜用禁忌厭禳之。乍寒乍熱乍有乍無南方多病此名曰瘴瘧。寒熱善饑而不能食。食已支滿腹急滿痛。痛已日作名曰胃瘧。六腑無瘧獨胃有者。蓋饑飽所傷胃氣而成。世謂之食瘧。飲食不節變成此證有經年不差。差後復發遠行久立下至

微勞力皆不任名曰勞瘧。亦有數年不差百藥不  
斷結為癥癖在腹脇名曰老瘧。亦曰母瘧

○又

說曰瘧寒熱並作也。痞熱瘧也。疫二日一發

○又

凡人患瘧疾皆因傷暑治之法當用暑藥素問瘧論有三陰三陽辨其證候各隨經而制之。寒多者用溫藥。熱多者用涼藥。不易之法也。有積者必腹疼當用巴豆藥去其積。有熱者當用小柴胡湯。有寒者當用硃砂硫黃大蒜之類。然瘧疾住後不得服補藥。補之必再作

○驢軸治瘧

療瘡無問久新發無期者。驢尾下軸垢水洗取汁和麪丸如彈丸二枚作燒餅瘡未發前食一枚至發後食一枚。

○疝疾

毛崇甫事母葉夫人極孝。葉年六十一歲病疝旬餘憂甚。每夕向于北辰拜。且泣。妹立母側恍惚聞有告者曰。何不服五苓散。持一貼付之。啓視皆紅色。妹曰尋常此藥不如是安可服。俄若夢覺以語兄。醫云此病蓋濕熱所致。當加硃砂於五苓散內以應神言。纔服罷疝不復作。

○又

有宗室以恩添差通判常州郡守不甚加禮。遂苦

疝疾久而弗愈。族人牛遠為鈐軸素善醫。往問正聚話。疝作而顛。撼掖不醒。盡室駭懼。遠云無傷也。是中心抑鬱。陰陽交戰。至於墮厥。正四將軍飲子證也。先令灼艾灸至四百壯。了無蘇意。於是急製藥。以一大附子炮去皮臍四分之一。訶子四箇炮去核。陳皮四箇全者洗淨不去白。甘草四兩灸各自切碎。為四服用。水二盞。姜棗各七煎去五之三。持飲。病者初一杯灌之。不納。至再稍若吞嚥。三到候起。至四服盡。頓息更不服。一時急救如此。凡病疝臨發日。逐杯併服。無不神效。

出編

○瘡疾

瘡之病候。經論載之詳矣。先寒後熱。名曰寒瘡。先

熱後寒名曰溫瘧。但熱無寒名曰瘧瘧。但寒無熱名曰牝瘧。是皆發作有時。若邪氣中於風府則間日而作。邪氣客於頭項則頻日而作。氣有虛實邪中不同。故有早晚之異。然經止論寒溫瘧瘧所受之因而不及牝瘧。又論溫瘧瘧瘧所舍之臟而不攻寒瘧意有互見。發明處。學者究陰陽之盛衰深思以得之。大抵風者陽氣也。寒者陰氣也。先傷於風後傷於寒即先熱後寒。先傷於寒後傷於風即先寒後熱。陰氣先絕陽氣獨發則但熱無寒。陽氣先絕陰氣獨發則但寒無熱。以溫瘧得之於冬。邪氣襲於骨髓則知寒瘧。乃得之於夏。邪氣客於皮膚腠理之間矣。以瘧瘧之氣實而不堪且不及於

陰則知牝瘧。乃氣虛而泄且不及於陽矣。是皆不出於陰陽上下交爭虛實更作也。又有嶺南諸溪每嵐瘴鬼邪之氣亦寒熱羸瘦延引歲月休作有時久不已變成勞瘧。或結為癥瘕者名曰瘧母。至於三陽三陰瘧者皆因臟氣偏虛故邪氣乘而舍之。其治法各隨其經絡灸刺及所用藥各不同。後學宜細詳之。出類編同上

病有不可補者

病有不可補者一曰瘧疾。二曰狂疾。三曰水氣。四曰脚氣。此四疾治得稍愈切不可服煖藥以峻補之。後以平補藥亦須於本病上有益乃可。出醫餘

癥瘕



癥瘕

癥瘕之狀雖同而不動者為癥其治有法而可推  
移者名瘕瘕病輕於癥瘕不動者必死之候其發  
語聲嘶挹言語而不出此人食結在腹其病寒口  
中常有水出四肢洒洒如瘡食飲不能鬱而痛此  
食瘕也

遺積瘕

齊中尉潘滿如病小腹痛臣意診其脈曰遺積瘕  
也臣意即謂齊大僕臣饒內史臣繇曰中尉不復  
自止於內則三十日死後二十餘日洩血死病得  
之酒且內所以知潘滿如病者臣意切其脈深小  
弱其卒然合也。是脾氣也。右脈口氣至緊小見

瘕氣也。以次相乘故三十日死。三陰俱搏者如法  
不俱搏者決在急期一搏一代者近故在三陰搏  
洩血如前止出史記

螭瘕

臨菑女子薄吾病甚。衆醫皆以為寒熱篤當死。臣  
意診其脈曰螭瘕為病腹大上膚黃粗循之戚戚  
然。臣意飲以芫花一撮即出螭可數升病已三十  
日如故。病螭得之於寒濕。寒濕氣鬱篤不發化為  
螭。臣意所以知薄吾病者切其脈循其尺其尺索  
刺粗而毛美奉髮是螭氣也。其色澤者仲歲無邪  
氣及重病

蛇瘕

隋有患者嘗饑而吞食到下至胸便即吐出醫作  
噎疾蘭氣翻胃三候治之無驗有老醫任度視之  
曰非此三疾蓋因食蛇肉不消而致斯病但揣心  
腹上有蛇形也病者曰素有大風嘗求蛇肉食風  
稍退復患此疾矣遂以芒硝大黃而治之微泄利  
則愈醫皆記其驗而知蛇瘕也

○米瘕

乾德中江浙間有慎道恭者肌瘦如勞唯好食米  
到口中清水出情似憂思食米頓便如常衆醫不  
辯後遇蜀僧道廣處方以鷄屎及白米各半合共  
炒如粉以水一中盞調頓服良久病者吐出如米  
形遂差病源謂米瘕是也

○髮瘕

徐文伯字德秀篤好醫術宋明帝宮人患腰痛牽  
心發則氣絕衆醫以為肉瘕文伯視之曰此髮瘕  
也以油灌之即吐物如髮稍長引之長三尺頭已  
成蛇又能搖動懸柱上水盡灑唯餘一髮而已遂  
愈出名醫錄

○食髮致疾

唐書曰甄權弟車善醫時有尼明律年六十餘  
患心腹脹身體羸瘦已經二年車言診其脉曰  
腹內有蟲當是誤食髮為之耳因令服雄黃須臾  
吐一蛇如入手指小燒之猶有髮氣其疾乃愈

○瘕

異哉。曰章安有人元嘉中噉鴨肉乃成瘕病胃滿  
面赤不得飲食醫令服秫米須臾煩悶吐一鴨雛  
身喙翅皆已成就唯左脚故綴昔所食肉病遂差  
志怪曰有人得瘕病腹晝夜切痛臨終勅其子曰  
吾氣絕後可剖視之其子不忍違言剖之得一銅  
酒鎗容數合許華陀聞其病而解之便出巾櫛中  
藥以投鎗鎗即消成酒焉

出太平御覽

○ 鼈瘕

陳景弟長子拱年七歲時脇間忽生腫毒隱隱見  
皮裏一物頗肖鼈形微覺動轉其掣手痛不堪忍  
德興古城村外有醫洪豆腐見之使買鮮鰕為羹  
以食咸疑以為瘡毒所忌之味醫竟令食之下腹

未久痛即止喜曰此真鼈瘕也吾求其所好以嘗  
試之爾乃合一藥如療脾胃者而碾附子末二錢  
投之數服而消明年病復作但如前補治遂絕根  
本

○ 鼈瘕者

謂腹中瘕結如鼈狀是也。有食鼈觸冷不消而生  
者亦有食諸物肉得冷變化而成者皆由脾胃氣  
虛弱而遇食則不能尅消所致瘕言假也。謂其有  
形瘕而推移也。昔曾有主人共奴俱患鼈瘕奴在  
前死破其腹得一白鼈鼈仍活有人乘白馬來看  
視白馬遂尿隨落鼈上即縮頭乃遂以馬尿灌之  
即化為水其主曰吾將差矣即服之果如其言得

差出巢  
病源

○痲痺

夫痲痺之病大同而小異。痲者近臍左右成條大者如聚次者如弦之狀。痺者在兩肋之間有時而痛。此皆由陰陽不和經絡否隔飲食停滯不得宣流邪冷之氣搏結而成也。出鷄  
峯方

○京三稜治癥瘕

昔人患癥瘕死遺言令開腹取之得塊乾硬如石。文理有五色人謂異物竊取削成刀柄後因以刀刈三稜柄消成水乃知此可療癥瘕也。出本  
草

○諸蟲

應聲蟲

永州通判廳軍負毛景得奇疾每語喉中必有物作聲相應。有道人教令學誦本草藥名至藍而默然遂取藍據汁而飲之少頃吐出肉塊長二寸餘入形悉具。劉襄子思為永倅景正被疾年餘親見其愈。出泊  
宅編

○又

陳正敏遜齋閑覽載揚勛中年得異疾每發言應答腹中有小聲效之數年間其聲寢大有道士見而驚曰此應聲蟲也。久不治延及妻子宜讀本草遇蟲不應者當取服之。勛如言讀至雷九蟲忽無聲乃頓服數粒遂愈。正敏其後至長沙遇一丐者亦有是疾環而觀之甚衆。因教使服雷九丐者謝

曰某貧無他技所以求衣食於人者唯藉此爾以  
上皆陳所記予讀周張鷟朝野僉載云洛州有士  
入患應聲蟲語即喉中應之以問良醫張文仲張  
經夜思之乃得一法即取本草令讀之皆應至其  
所畏者即不言仲乃錄取藥合和為丸服之應時  
而止乃知古有是事

出五神居士  
鐵團山叢談

○ 蛇蟲

蛇蟲九蟲之數人腹中皆有之小兒失乳而哺早  
或食甜過多胃虛蟲動能令人腹痛惡心口吐清  
水腹上有青筋火煨使君子與食以殼煎湯送下  
甚妙然世人多於臨卧服之又無日分多不驗唯  
是於月初四五間五更服之至日午前蟲盡下可

以和胃溫平藥一兩日間調理之不可多也凡蟲  
在入腹中月上旬頭向上中旬橫之下旬頭向下  
故中下旬用藥即不入蟲口所以不驗也牛馬之  
生子月上旬生者行在母前中旬生者並肩而行下  
旬生者後隨之猫之食鼠亦然上旬食上段中旬  
中段下旬下段自然之理物皆由之而莫知之

○ 五臟之蟲

心蟲曰蛔脾蟲寸白腎蟲如寸截絲縷肝蟲如爛  
杏肺蟲如蠶皆能殺人惟肺蟲為急肺蟲居肺葉  
之內蝕入肺絲故成瘵疾咯血聲嘶藥所不到治  
之為難有人說道藏中載諸蟲皆頭向下惟自初

一至初五以前頭上行故用藥者多取月朏以前  
蓋此也。如療寸白用良方錫炒蕪美檳榔者極佳。  
五更服蟲盡下。白粥將息藥用石榴根濃汁一升  
散三錢。丸五枚。出本草

○九蟲之狀

九蟲者一曰伏蟲長四分為羣蟲之長。二曰白蟲  
長一寸相生至多其母長至四五文則殺人。三曰  
肉蟲狀如爛杏令人煩懣。四曰肺蟲其狀如蠶令  
人咳。五曰胃蟲狀如蝦蟆令人吐逆嘔噦。六曰弱  
蟲狀如瓜瓣令人多唾。七曰赤蟲狀如生肉令人  
腸鳴。八曰蟻蟲至微細狀如菜蟲居洞腸間多則  
為痔漏瘻疽諸瘡無所不為。九曰蛇蟲長三寸貫

心則殺人。又有尸蟲與人俱生狀如犬馬尾。或如  
薄筋依脾而居長三寸許大害於人。然多因臟虛  
疾寒勞熱而生。

○諸蟲入耳

蟲之類能入耳者不獨蚰蜒。如壁虱螢火扣頭蟲  
阜角蟲皆能為害。有人患腦痛為蟲所食。或教以  
桃葉為枕。一夕蟲自鼻出形為鷹嘴人莫識其名。  
有人蚰蜒入耳過其極時以頭撞柱至血流不知  
其痒甚不可忍。蚰蜒入耳往往食髓至盡尤能滋  
生。凡蟲入耳用生油灌妙。出齋

○誤吞水蛭

吳少師在關外嘗得疾。數月間肌肉消瘦。每日飲

食下咽少時腹如萬蟲攢攻且痒且痛皆以為勞  
瘵也。張銳是時在成觀。果遣驛騎招致銳到興元  
既切脉戒云明日早且忍饑勿啖一物俟銳來為  
之計旦而往。天方劇暑曰請選一健卒趨往千里  
外取行路黃土一銀盃而令厨人旋治麩將午乃  
得食纔放筋取土適至於是温酒二升投土攪其  
內出藥百粒進於果飲之。覺胃胃掣痛幾不堪忍  
急登溷銳密使別坎三穴便掖果以行。湏臾暴下  
如傾穢惡斗許有馬黃千餘宛轉盤結其半已困  
死。果亦憊甚扶憇竹榻上移時方食粥一器三日  
而平始言去年正以夏夜出師中途燥渴命步兵  
持馬盃挹澗水甫入口似有物焉未暇吐之則徑

入喉矣。自此遂得病。蟲入人肝脾囊勢須滋土常  
日遇食時則聚丹田間。吮啞精血飽則散處四肢。  
苟唯知殺之而不能掃盡故無益也。銳是以請公  
枵腹以誘之。此蟲喜酒。又久不得土味乘饑畢集  
故一藥能洗空之。果大喜厚賂以金帛送之歸。  
志出庚

○又

寧國衛承務者唯一子忽得疾羸瘦如削醫以為  
瘵疾治療無益醫劉大用問其致疾之因曰嘗以  
六月飲娼家醉卧卓上醒渴飲之自是疾作。劉默  
喜密遣僕掘田間游壑以水灌取清汁兩盃置几  
上令隨意飲。衛子素厭穢苦不以穢為嫌一飲而

盡俄腸胃間覺轉攪疼痒久之始定。續投以宣藥百粒隨即洞腸下水蛭約六十餘條。便覺襟抱豁然。劉曰此水蛭盆中所集誤吞也。蛭入大腹藉膏血滋養蕃育種類每黏貼五臟牢不可脫。然久去汙渠思其所嗜非以物致之不能盡也。然尪羸別以藥調補。

○又

有人因醉薄暮渴飲道傍田水。自此忽患胃腹脹滿。遍醫不效。人亦莫識其病。因幹宿客邸夜半思水飲令僕覓之。僕夜捫廡見有缸數隻。疑店主以此貯水遂取一盃與其主飲。便覺胃次豁然。再索之忽覺臟腑急痛於店及空地大瀉一二行。平

視之所瀉乃水蛭無數。繼看夜來所飲缸水乃店人刈藍作靛者其病頓愈。方思前時渴飲田水不覺誤吞水蛭入腹遂成脹痛之疾。乃蛭為害。今人耘田為此蟲所齧以靛塗之無不愈也。

○苦寸白蟲

稍子山宋景富邵武軍天王寺苦寸白蟲為撓醫者戒云是疾當止酒而以素所耽嗜欲罷不能。一夕醉於外舍。已夜半口乾咽燥倉卒無湯飲適廊廡間有甕水月色下照瑩然可掬即搦而飲之。其甘如飴連盡數酌乃就寢。迨曉蟲出盈席覺腹中頓寬宿疾遂愈。一家皆驚異驗其所由。蓋僕織草履浸紅藤根水也。

出庚志



又  
掘石榴根東引者剉一大握再無他味隔宿虛其  
腹凌晨溫酒調服妙

又  
蔡定夫戡之于康積苦寸白為孽醫者使之碾殯  
榔細末取石榴東引根煎湯調服之先炙肥豬肉  
一大臠寘口中嚙咀其津膏而勿食之此蟲惟月  
三日以前其頭向上可用藥攻打餘日即頭向下  
縱有藥皆無益蟲聞肉香咂啖之意故空羣爭赴  
之覺如箭攻攢是其候也然後飲前藥蔡如其戒  
不兩刻腹中雷鳴急奏瀉蟲下如傾杖挑皆聯綿  
成串幾長數丈尚蠕蠕能動置之溪流宿患頓愈

姑廣其傳以濟

○誤吞蜈蚣

有村店婦人因用火筒吹火不知筒中有蜈蚣藏  
焉用以吹火蜈蚣驚逆竄入喉中不覺下胃臆婦  
人求救人無措手忽有人在傍云可計小豬兒一  
箇切斷喉取血與婦人頓吃之須臾以生油一口  
灌婦人遂惡心其蜈蚣滾在血中吐出繼與雄黃  
細研水調遂愈

○蚰蜒及百蟲入耳

蚰蜒入耳取驢乳灌耳中當消成水百蟲入耳以  
桃葉火熨卷而塞耳中立出

○尸蟲

出本

柳子厚罵尸蟲文云人皆有三尸蟲處腹中伺人  
隱微失誤輒籍記日庚申幸其人之睡出讒于帝  
以求饗以是人多謫過疾癘夭死而醫經亦云能  
與鬼靈相通常接引外邪為患害其發作之狀或  
沉沉默默不得知其所苦而無處不惡或腹痛脹  
急或積塊涌起或攣引腰脊或精神雜錯變證多  
端其病大同而小異

出鷄  
峯方

○酒蟲

齊州士曹席進孺招所親張彬秀才為館舍彬嗜  
酒每夜必寘數升於牀偶一夕忘設焉夜半大渴  
求之不可得恚悶呼燥俄頃嘔吐一物于地旦起  
視之見牀下塊肉如肝而黃上如蜂窠猶微動取

酒沃之唧唧有聲始悟平生酒病根本亟投諸火  
中後遂不飲

醫說卷第五

醫說卷第六

○臟腑泄痢

當暑勿食生冷

當盛暑時。飲食加意調節。緣伏陰在內。腐化消滯。又果實園蔬。多將生噉。蘇水桂漿。唯欲冷飲。生冷相值。剋化尤難。微傷即殮。泄重傷則霍亂吐利。是以暑月食物。尤要節減。使脾胃易於磨化。戒忌生冷。免有腹臟之疾。雖盛夏冒暑。難為全斷。飲冷但剋意少飲。不與生硬果菜油膩甜食相犯。亦不至生病也。

○辯臟寒下利

宋新安張景  
季明集

病水洩青白或黃白或米穀不化腸鳴腹痛者此傷冷也。為洞泄寒中又為霍亂吐瀉其脈細弱而緊宜理中丸平胃散調中湯以溫補之。盛則朝真丹主之。或藥入則吐者內陰盛也。用湯者當以冷服用丸者以地漿服熱因寒用之法也。病水泄下深黃及有完穀小便赤腹脇但脹滿而不痛煩燥悶亂渴而喜飲者此傷熱也。為挾熱下利其脈洪大而數宜駐車丸參連散蘗皮湯以和之。甚則三黃丸調胃承氣湯挾熱下血者蘗皮湯主之。病洩瀉色黃而有沫腸鳴腹脇脹滿時微作痛者為冷熱不調其脈沉緊而小數也。服藥熱則轉甚戊己丸香連丸主之。下部注悶裏急後重者必欲變

膿血利之則愈。病暴泄注悶裏急下或青白或黃白米穀或化或不化腹脇或脹或不脹或痛或不痛但噫生熟氣全不思食因與溫補諸藥而後轉有異證者有所傷也。止為殮泄其脈外虛而內實關脈沉且深也。宜消積丸不二丸以化之。甚則用備急丸主之。右不二丸用此不可。又春傷於風夏必殮泄。又風氣行於腸胃則暴泄下利其脈浮緩而虛也。並宜服羌活安中湯胃風湯荆黃湯訶梨勒散主之。病赤白下痢或膿多血少或膿少血多皆為有積或先挾熱泄瀉更服溫藥因變膿血下痢關脈沉緊按之有力而小疾也。並宜先與消化積滯纔微利過即以香連丸駐車丸戊己丸便愈。

化積滯用消積丸不二九感應丸淹延惡利用朱  
粉丹主之

○治赤白痢

有人久患痢赤白當下或純白或純赤百藥不愈  
若病久服藥已多治痢多用毒藥攻擊得臟氣不  
和所以難愈史載之用輕清和氣藥與之遂愈後  
來屢有驗重方用罌粟殼蜜炙人參白朮白茯苓  
川芎甘草炙黃芪等分為細末二錢水一盞生薑  
棗烏梅半箇煎八分溫服不拘時

○久患泄瀉

有人久患泄瀉以煖藥補脾及分利小水百種治  
之不愈醫診之心脉獨弱以益心氣藥補脉服之

遂愈蓋心火也脾土也火生土脾之旺賴火之燥  
心氣不足則火不燥脾土受濕故令受泄瀉令益  
心補脾而又能土濕豈有不效者又有一種泄瀉  
作冷作積作心氣不足治之及服硫黃附子甚多  
皆不效因服火枚丸而愈此腸胃有風冷也胃風  
湯兼服煖藥亦佳又有一種脾泄瀉服太山老李  
灸肝散而愈乃白芷白朮白芍藥桔梗四味也

○痢有赤白

凡人患痢不問赤白脉小身涼者易安脉大身熱  
者難差患痢未有不腹痛者皆緣有積也暑積及  
熱積多患赤痢冷積多患白痢亦有腸胃有風而

患赤痢者有冷熱不調而患赤白痢者暑積痢可用黃連阿膠丸綿煎散加滑石白痢可用駐車丸感應丸之類冷熱不調用戊巳丸巴豆九子之類糶煎散入滑石治赤痢極有功又有巴豆飲子加減亦有功治諸般痢用之每有效官局靈砂丹亦甚奇此數藥自夏及秋皆不可用也同上

○罌粟治

治痢以罌粟古方未聞今人所用雖其法小異而皆有奇功或用數顆慢火炙黃為末米飲下或去粟用殼如上法或以殼五七枚甘草一寸半生半炙大盞水煎取半盞溫溫呷蜀人山叟曰殼并去核鼠杏子各數枚焙乾末之飲下尤治噤口痢出泊

編宅

○車前止暴下

歐陽文忠公常得暴下國醫不能愈夫人云市人言此藥三文一貼甚效公曰吾輩臟腑與市人不同不可服夫人使以國醫藥雜進之一服而愈召賣藥者厚遺之求其方乃肯傳但用車前子一味為末米飲下二錢七云此藥利水道而不動氣水道利則清濁分穀臟自止矣出良方

○薑茶治利

憲宗賜馬總治瀉利腹痛方以生薑和皮切碎如粟米用一大盞并草茶相等煎服之先祐二年文潞公得此疾百藥不效予傳此方而愈同上

○二藥治痢

鄂渚有統制王存病痢幾年無休無息骨立垂死逢人令煎四物湯下駐車丸每服一百粒初服此藥減半併服之不數日頓愈出方

○治臟腑

肉苳蔻剉作甕子入通明乳香少許復以末塞之不盡即用麩和少許裏苳蔻煨焦黃為度三物皆碾末仍以茶末對烹之出大方

○半夏益脾止瀉

惡夏今人惟知去痰不言益脾蓋能分水故也脾數濕則濡而困困則不能制水經曰濕勝則瀉一男子半夜如廁或教以生薑一兩碎之半夏湯洗

與大棗各三十枚水一升磁餅中慢火燒為熱水時時呷數日便已

○乳煎葦撥治氣

獨異志唐貞觀中張寶藏為金吾長嘗因下直歸櫟陽路逢少年畋獵割鮮野食倚樹嘆曰張寶藏身年七十未嘗得一食酒肉如此者可悲哉傍有僧指曰六十日內官登三品何足嘆也言訖不見寶藏異之即時還京師時太宗苦於氣痢衆醫不效即下詔問殿廷左右有能治此疾者當重賞之寶藏曾困其疾即具疏以乳煎葦撥方上服之立差宣下宰臣與五品官魏澄難之逾日不進上疾復發問左右曰吾前飲乳煎葦撥有功復命進之

一啜又平。因思曰：嘗令與進方，入五品官不見除授，何也？證懼曰：奉命之際，未知文武二吏怒曰：治得宰相不妨已。授三品官，我天子也，豈不及汝耶？乃厲聲曰：與三品文官授鴻臚卿，時正六十日矣。其方每服用乳半升，草撥三錢匕，同煎減半，空腹頓服。方出良

○臟腑秘澁

老人臟腑不可用大黃。老人津液少，所以秘澁。更服大黃以瀉之，津液皆去，定須秘澁甚於前矣。可服寬潤大腸之藥，如養生必用方二仁丸是也。更用槐花末煎湯淋洗，亦妙。

○風藥燥腸

又有一種風痢者，當用檳榔七聖丸。雖有大黃斟酌服之，勿令瀉可也。又有婦人產後大便秘澁，四五日六七日不通者，出血已多，津液少也。濃煎紫蘇湯飲一盃，兩盃自通。更一日不通，服局方大麻仁丸三十九。出賢餘

○腸胃流熱

腸胃流熱，則糞門暴腫。用蝸牛細研塗之，則消。

○腸風痔疾

痔腸風臟毒

痔腸風臟毒，一體病也。極難用藥，緣其所以致疾不同。雖良藥，若非對病，固難一槩取效。常人酒色飲食不節，臟腑下血，是謂風毒。若釋子輩，患此多。



應飽食久坐體氣不舒而得之乃脾毒也。王渙之知舒州下血不止。郡人朝議大夫陳宜父令以四時按其方取栢葉如春取東枝之類燒灰調二錢服而愈。子得方後官顛嘗以治貳庫吳令昇亦即效。提點司屬官陳逸大夫偶來問疾吳倅告以用陳公之方而獲安。陳君感額曰仙人也。仍須用側栢為佳。道場慧禪師曰若釋子恐難用此不若灼艾最妙。平直量骨脊與臍平處推上灸七壯。或年深更於椎骨兩傍各一寸灸如上數無不除根者。又予外兄劉向為巖椽子過之留飲訝其瘦瘠問之。答曰去歲臟毒作凡半月自分必死得一藥服之至今無苦。問曰何藥不肯言再三扣始言只這

卓子上有之。乃是乾柿燒灰飲下二錢。本草柿治腸澼解熱毒消宿血。有病者宜求之。蓋因腸澼為痔。出宿編宅

○腸風下血

人患腸風下血者何也。人腸皆有脂裹之。厚則腸實而安。腸中本無血。血緣有風或有熱以消其脂。腸遂薄滲入身中。血初患者必服冷藥而愈。服之過當則腸寒而脂逾不生。其血必再作。凡熱者其血鮮。冷者其血青黑。察其冷熱用藥可也。出醫餘

○酒痢

有人日逐飲酒遂成酒痢骨立不食。但飲酒一兩。蓋痢作幾年矣。因與香茸丸一兩服遂止。蓋能治

酒毒

○臟毒下血

洛陽一女子年四十六七。耽飲無度。多啖魚蟹。攝理之方不閑也。後以飲啖過常。蓄毒在臟。日夜二十度。大便與膿血雜下。大腸連肛門痛不堪忍。醫以止血痢藥。不效。又以腸風藥。則益甚。蓋腸風則有血而無膿。凡如此已半年餘。氣血漸弱。食漸減。肌肉漸瘦。稍服熱藥。則腹愈痛。血愈下。稍服涼藥。則痢如注。氣羸粥愈減。服溫平藥。則病不除。將暮歲。醫告術窮。垂命殆盡。或有人教服人參散。病家亦不敢主。嘗謾與服之。纔一服。止。二服。減。三服。膿血皆定。自此不十服。其疾遂愈。後問其方云。治

大腸風虛。飲酒過度。乃挾熱下利。膿血疼痛。多日不差。檉根白皮。人參各一兩。為末。二錢匕。空心溫酒調。不飲酒。以米飲代。忌油膩。濕麪。青菜。果子。甜物。鷄魚。蒜等。出衍義

○脫血

痢色多青。泄而脫血。尺脉緩。瀆謂之解跡。安卧脉盛。謂之脫血。卧久傷氣也。

○癰疽

服石發疽

齊主侍醫遂。病自鍊五石服之。臣意往過之。遂謂意曰。不肖有病。幸診遂也。臣意即診之。告曰。公病中熱。論曰。中熱不洩者。不可服五石。石之為藥。精

悍公服之不得數溲。亟勿服色。將發瘰。遂曰扁鵲  
曰陰石以治陰病。陽石以治陽病。夫藥石者有陰  
陽水火之齊。故中熱即為陰石。柔劑治之。中寒即  
為陽石。剛劑治之。臣意曰公所論遠矣。扁鵲雖言  
若是。然必審診。起度量。立規矩。稱權衡。合色脉表  
裏。有餘不足。順逆之法。參其人動靜與息相應。乃  
可以論。論曰陽疾處內。陰形應外者。不加悍藥。及  
鑱石。夫悍藥入中。則邪氣辟矣。而宛氣愈深。診法  
曰二陰應外。一陽接內者。不可以剛藥。剛藥入則  
動。陽陰病益衰。陽病益著。邪氣流行為重。困於俞  
反始俞。恣發為疽。意告之後。餘百日果為疽。發乳上  
入缺盆死。此謂論之大體也。必有經紀。拙工有一

不習文理。陰陽失矣。

出史記

○病疽

齊侍御史成自言病頭痛。臣意診其脉。告曰君之  
病惡不可言也。即出獨告成弟昌曰。此病疽也。發  
於腸胃之間。後五日當臈腫。後八日嘔膿死。成之  
病得之飲酒且內。成即如期死。所以知成之病者  
臣意切其脉。得肝氣。肝氣濁而靜。此內關之病也。  
脉法曰脉長而弦。不得代四時者。其病主在於肝。  
和即經主病也。代則絡脉有過。經主病和者。其病  
得之筋髓。囊其代絕而脈賁者。病得之酒且內。所  
以知其後五日而臈腫。八日嘔膿死者。切其脉時  
少陽初代。代者經病。病去過入。入則去絡脉。主病

當其時少陽初關一分。故中熱而膿未發也。及五分則至少陽之界。肝與心相去五分。故曰五日盡也。及八日則嘔膿死。故上二分而膿發至界而腐。腫盡泄而死。熱上則熏陽明爛。流絡流絡動則脈結發。脈結發則爛解。故絡交熱氣已上行至頭而動。故頭痛。出史記

○治背瘡

京師人司仲因言里人父患背瘡若負火炭晝夜呼叫。其子泣於途。遇道人曰子何憂之深也。告之道人曰子當求不耕之地。遇野人糞為蟲鳥所殘。即以杖去其糞取其下土篩而傅之。乃如其言。用之立愈。父曰豈以冰著吾背耶。吾五臟俱寒矣。出類

編

○治喉癰

楊立之自廣府通判歸楚州喉間生癰穴腫潰而膿血流注。曉夕不止。寢食俱廢。醫者束手。適楊吉老來赴郡守招立之。兩子走往邀之。至熟視良久曰。不須看脈已得之矣。此疾甚異。須先啖生薑片一斤。乃可投藥。否則無法也。語畢即出。子有難色曰。喉中潰膿痛楚。豈食生薑立之。曰。吉老醫術通神。其言不妄。試取一二片啗我。如不能進則屏去無害。遂食之。初時殊為甘香。稍復加益。至半斤許。痛處已寬。該一斤始覺味辛。粹膿血頓盡。粥餌入口了無滯礙。明日招吉老謝而問對曰。君官南方

嘗食鷓鴣。此禽好啖半夏。久而毒發。故以薑製之。今病源已清。無服他藥。予記唐小說載崔魏公暴亡。醫梁新診之。曰：食毒。僕曰：嘗好食竹鷓。梁曰：竹鷓常食半夏苗。蓋其毒也。即攪生薑汁折齒灌之。遂復活。甚與此相類。出類說

○治癰疽

房州虞候張進。本北方人。因送郡守還。逢道人買酒與飲。得其治癰疽方。寄居文錄。曹子病背瘡。醫不能療。聞進有此技。試呼之。進元無手訣。但以成藥塗傳。未旬而愈。張子温五歲而生瘡於鬚邊。繼又發於腦後。證候可憂。亦以付進。凡所用皆一種。不過三夕。二者皆平温。與之錢而問之。進不復有。

隱謹以告。但擇阿膠透徹者。一兩。水半盞。煎令消。然後入號丹一兩。慢火再熬數數。攪勻。候三五沸。乃取出。攤令極冷。貯於瓶罌中。如用時。以毛掃布瘡四面。而露其口。如瘡未成。則遍塗腫處。良久自消。切勿犯手。更無他法。雖一切惡瘡。皆可治。傳不特癰疽也。同上

○治癰疽方

歙丞胡權在都下。遇異人。授以治癰疽內托散方。曰：吾此藥能令未成者速散。已成者速潰。敗膿自出。無用于醫。惡肉自去。不用刀砭。服之之後。痛苦頓減。其用人參黃芪一二兩。芎藭防風厚朴檳榔白芷各等分。皆細末。別入桂末一兩。每服五錢。熱

酒調服以時為妙不能飲者木香湯下不若酒服為奇

○療癰疽毒

白友正為江陵支使攝公安令疽發於胃臆間半歲弗愈浴罷痛甚委頓而卧似夢非夢見一丈夫相揖而坐傳藥方與之曰用沒藥瓜萋乳香三味酒煎服之且言桃源許軫知縣亦有此方但不用瓜萋若用速效宜服此友正敬謝即如所戒不終劑而愈後詣丑泉禱雨瞻關王像蓋所感夢者因繪事於家出類編

○發背無補法

諺云背無好瘡但生於正中者為真發背虞變傳

郎背中生小瘡不快只以藥調補數日不疼不痒又不滋蔓呼外醫灸二百壯已無及此公平生不服藥二年來唯覺時時手脚心熱疾作既不治又服補藥何可久也出治編

○結癰

五臟不和則九竅不通六腑不和則留結為癰

○預療背疽

揚州名醫楊吉老其術甚著某郡一士人狀若有疾厭厭不聊莫能名其何等病苦往謁之楊曰君熱症已極氣血消燼且盡自此三年當以背疽死不可為也士人不樂而退聞茅山觀中一道士於醫術通神但不可以自召未必為人致力士人心

計交切。乃衣僮僕之服詣山拜之。願執薪水之役。於席下。道士喜留寘。弟子中誨以讀經。晝夜祇事。左右順旨如意。歷兩月。久覺其與常隸別。呼扣所從來。始再拜謝。過以實白之。道士笑曰。世間那有醫不得底病。汝試以脉示我。纔診脉。又笑曰。汝便可下山。吾亦無藥與汝。但日日買好梨喫一顆。如生梨已盡。則取乾者沱湯飲之。仍食其滓。此疾自當平。士人歸。謹如其戒。經一歲。復往揚州。揚醫見之。驚其顏貌。臆澤脉息和平。詫之曰。君必遇異人。不然。豈有痊安之理。士人以告揚。立具衣冠焚香。望茅山設拜。蓋自咎其學之未至。地夢瑣言載醫者趙鄂云。一朝士疾危。只有一法。請常喫消梨。不

限多少。如咀嚼不及。掇汁而飲。或希萬一用其言。遂愈。此意正同。出類編

○雲母膏愈腸癰

揚介吉老者泗州人。以醫術聞四方。有儒生李氏子。棄業願娶其女。以授其學。執子婿禮甚恭。吉老盡其精微告之。一日有靈璧縣富家婦有疾。遣人邀李生以往。李初視脉云。腸胃有所苦耶。婦曰。腸中痛不可忍。而大便從小便中出。醫者皆以理無此疾。證不可治。故欲屈君子李。曰。試為籌之。若始服我之藥三日。當有瘳。不然非某所知也。下小丸子數十粒。煎黃芪湯下之。富家依其言。下膿血數升而愈。富家大喜。贈錢五十萬。置酒而問之曰。始

切脉時覺芤脉現於腸部。王叔和脉訣云寸芤積血在胃中。關內逢芤胃內癰。此癰生腸內。所以致然。所服者乃雲母膏為丸。爾切脉至此可以言醫矣。李後以醫科及第。至博士。李士元即其子也。王出徐仲言徐語

○疽

張嗣伯嘗聞屋中呻吟聲。嗣伯曰此痛甚重。乃往視之。見一老人。口稱體痛而起處有黯黑無數。嗣伯還煮斗餘湯送令服之。服訖痛勢愈甚。跳投牀者無數。須臾所黯處皆拔。出釘長寸許。以膏塗瘡口。三月而復。云此名釘疽也。

○癰瘡

唐李勣嘗疾醫診之。云得鬚灰服之即止。太宗遂自剪鬚燒灰賜服之。復令傅癰瘡立愈。故申樂天云剪鬚燒藥賜功臣。仁宗皇帝賜呂夷簡。古人有語髭可治疾。今朕剪鬚與之。合藥表此意也。

○脚氣

脚氣痞絕

唐柳柳州纂救死三方云元和十二年二月得乾脚氣夜成痞絕。左脇有塊大如石且死。因大寒不知人。三日家人號哭。滎陽鄭洵美傳杉木湯服半食頃大下三次。氣通塊散。用杉木節一大升。橘葉一升。無葉以皮代。火伏櫛擲七箇。合子碎之。童子小便三大升。共煮一升半。分二服。若一服得快利。



停後服已前三病皆死矣。會有救者皆得不死。恐他人不幸有類于病故傳焉。出本

脚氣無補法

脚氣乃風毒在內不可不攻。故當先瀉之。

脚氣如中箭

道士王裕曰有忽患脚心如中箭發歇不時。此腎之風毒瀉腎愈。出泊宅編

脚氣

今人謂之脚氣者。黃帝所謂緩風温痺也。千金方云頑弱名緩風。疼痛為濕痺。

治閉結并脚氣

饒醫熊彥誠年五十五歲病前後便溺不通五日。

腹脹如鼓。同輩環視皆不能措力。與西湖妙果僧慧用相善。遣信邀致訣別。用驚馳而往於釣橋逢一異客風姿瀟灑。出塵揖之曰方外高士何子子走趨如是。用曰一善友久患閉結勢不可療。急欲往問。客曰此易事也。待奉施一藥。即脫靴入水探一大螺而出。曰事濟矣。轉抵其家以鹽半匙和殼生擣碎置病者臍下一寸三分。用寬帛緊繫之。仍辦觸器以須其通。用未以為然。姑異謝之。熊昏不知人。妻子聚泣。諸醫知無他策。謾使試之。曾未安席。若然暴下。醫愧歎而散。用歸訪異人無所見矣。熊後十六年乃終。白石董守約以脚氣攻注為苦。或教之搥數螺傳兩股上。便覺冷氣趨下。至是既

而亦安

出類編

○附船愈脚氣病

顧安中廣德人久患脚氣筋急腿腫行履不得因至湖州附船中有一袋物為腿疼痛遂將腿閣袋上微覺不痛及筋寬而不急乃問稍入袋中何物應曰宣瓜自此脚氣頓愈

出名醫錄

○脚蹙

有人病兩脚蹙不能行舉詣華陀陀望見云已飽鍼灸服藥矣不須復看脉便使解衣點背數十處相去或一寸或五寸縱邪不相當言灸此各十壯灸瘡愈即行後灸處夷脊一寸上下行端直均調如引繩也

出華陀傳

○旋覆根能續筋

筋斷復續者取旋覆根絞取汁以筋相對取汁塗而封之即相續如故蜀兒好走走嘗刻筋以此續之百不失一

○漏

時康祖心漏

時康祖大夫患心漏二十年當曾數竅血液長流屢訪明醫皆云不可治或云竅多則愈損閉則慮穴他岐當存其三猶為上策坐此形神勤瘁又坐則苦腰痛行則偃僕不飲酒雖鷄魚蟹蛤之屬亦皆不向口淳熙四年通判韶州郡守韓子温見而憐之為檢聖惠方載腰痛一門冷熱三法示之使

自擇康祖訣曰康祖年老人羸安敢以為熱始作  
寒冷治療一方用鹿茸者服之餘旬痛減仍覺氣  
宇和暢遂一意專服悉屏他藥泊月餘腰屈復伸  
無復呼痛心漏亦愈以告醫者皆不能測其所以  
然後九年康祖自鎮江通判滿秩造朝訪子温則  
精力倍昔飲饋無所忌步履輕捷云漏愈之後日  
勝一日子温書吏吳汝弼亦苦是疾使親求藥服  
之旬有三日而差其方本只治腰痛用鹿茸去毛  
酥炙微黃附子炮去皮臍皆二兩鹽花三分為末  
棗肉為丸三十九空心酒下已

○鱧魚覆漏

馬提刑記醫先祖忠肅公天聖中以工部尚書知

濠州家有媪病漏蓋十餘年一日老兵掃地庭下  
且言前數日遇市有醫自遠來道瘡漏可治特頃  
刻之力耳媪曰吾更醫多矣不信也其黨有以白  
忠肅公者即為召醫禮之曰可治無疑須活鱧一  
竹鍼五七枚醫乃擲鱧於地鱧困屈盤就盤以竹  
鍼貫之覆瘡良久取視其白蟲數十如鍼著鱧醫  
即令置杯中蠕動如線復覆之又得十餘枚如  
是五六醫者曰蟲固未盡然其餘皆小蟲竟請以  
常用藥傳之時家所有擯榔黃連為散傳之醫未  
始用藥明日可以乾艾作湯投白礬末三二錢洗  
瘡然後傳藥其老人血氣冷必假艾力以佐湯而  
艾性亦能殺蟲也如是者再即生肌不一月當愈

已而如其言。醫曰瘡一月不治則有蟲。蟲能蠕動。氣血亦隨之。故瘡漏不可遽合。則結痛實。蟲所為。又曰人每有疾。經月不痊。則必疲憊虛勞。婦人則補脾血。小兒則防驚疳。二廣則并治瘡癩。醫無名於世而治疾甚效。亦良醫也。又其言有理。故併錄之。出良

○鱧漏

有人脚肚上生一瘡。久遂成漏。凡經二年。百藥不效。自分必死。一村人見之。云此鱧漏耳。但以石灰二三升。百沸湯須薰洗。如覺痒即是也。病者如其言。用灰湯淋洗。果痒。竟用此洗。不三二次。遂乾。

○蟻漏

有婦人項下忽生一塊腫。漸綠至妳。上腫起。莫知何病。偶用刀刺破。出清水一碗。日久瘡不合。有道人見之。曰此蟻漏耳。緣飲食悞。食蟻得此。婦人云曾來吃飯時。羣蟻緣飯上。逐之用湯泡喫。往往有死蟻在中。不覺食之。道人云此易治。但用穿山甲數片。燒存性。為末。傅瘡上。遂愈。蓋蟻畏穿山甲故也。

○犬齧瘤得鍼

處士蒯亮言其所知。額角患瘤。醫為剖之。得一黑石碁子。巨斧擊之。終不傷缺。復有足脛生瘤者。因至親家為獬犬所咋。正齧其瘤。其中得鍼百餘枚。皆可用。疾亦愈。

○灸鼠瘤漏

柳休祖者善卜筮其妻病鼠瘤積年不差遂命休祖遂卜得頤之復按卦合得姓石入治之當獲鼠而愈也既而鄉里有奴姓石能治此病遂灸頭上三處覺佳俄有一鼠逕前而伏呼犬啗之視鼠頭有三灸處妻遂差出拾遺記

○李生虱瘤

浮梁李生得背痒疾隱起如覆盂無所痛苦唯奇痒不可忍飲食日以削無能識其為何病醫者秦德立見之曰此虱瘤也吾能治之取藥傳其上又塗一縣帶繞其圍經夕瘤破出虱斗許皆蠢蠕能行動即日體輕但一小竅如箸端不合時時虱涌

出不勝計竟死于記唐小說載賈魏公鎮滑臺日州民病此魏公云世間無藥能療唯千年木梳燒灰及黃龍浴水乃能治爾正與此同

○腫癭

病腫

先痛而後腫者氣傷形也先腫而後痛者形傷氣也風勝則動熱勝則腫燥勝則乾寒勝則浮濕勝則濡

○腫

釋名曰腫鍾也寒熱氣所鍾聚也

出太平御覽

○陰腫如鍾

治男子陰腫大如升核痛人所不能治者擣馬鞭

草塗之

○小兒陰腫

小兒陰囊忽虛腫痛以生甘草調地龍糞輕輕塗之

○小兒熱毒遊腫

破草鞋人亂髮燒灰醋和傅治熱毒遊腫

出本草

○婦人陰腫堅硬

用枳實半斤碎炒令熱故綿裹熨冷則易之同上

○脚腫

有男子六十一歲脚腫生瘡忽食豬肉不安醫以藥利之稍愈時出外中風汗出後頭面暴腫起紫黑色多睡耳輪上有浮泡小瘡黃汗出乃與小續

命湯加羌活一倍煎服之遂愈

出本草附義

○背腫

楊愔患背腫馬嗣明以鍊石塗之便差鍊石法以粗黃色石如鵝鴨卵大猛火烧令赤內醇醋中看有石屑落頻燒至石盡屑曝乾擣篩醋和塗腫上無不愈

○腮腫

仁宗在東宮苦腮腫用赤小豈末傅之遂愈或云

可療發背出洞微志

○癭

說文曰癭頸瘤也典術曰服食天門冬治癭除百

病出太平御覽

○井錫鎮瘻

汝州人多病頸瘻彼境地饒風沙沙入井中飲其  
水則生瘻故人家井以錫為井欄皆以夾錫錢鎮  
之或沉錫其中則飲者免此患華亭有一老僧昔  
行脚州南寺下寺僧童僕無一不病瘻又有洛僧  
共寮每食取携行苔脯同餐經數月僧項贅盡消  
若未嘗病寺僧嘆訝乃知海岸鹹沙物能除是疾

出癸志

○中毒

中仙茅附子毒

鄭長卿資政說少時隨父太宰官陳州一將官服  
仙茅遇毒舌脹出口漸大與肩齊善醫環視不能

治一醫獨曰尚可救少緩無及矣取小刀釐其舌  
隨破隨合釐至百數始有血一點許醫喜曰無害  
也舌應時消縮小即命煮大黃朴硝數碗連服之  
并以藥末搽舌上遂愈又孟諫郎中說其兄詵因  
感疾醫盧生勸服附子酒每生切大附二兩浸以  
斗酒旦起輒飲一杯服之二十年後再為陝西漕  
使諫自太學歸過之南樂縣拉同行中途曉寒詵  
飲一杯竟復令温半杯比酒至自覺微醉乃與妻  
使飲行數里妻頭腫如斗脣裂血流下注路傍呼  
隨行李職醫告之李使黑荳菜荳各數合令生嚼  
之且煎湯併飲至曉腫始消詵仍服之不輟到長  
安數月失明遂致仕時方四十歲

中蘆毒

崇寧間蘇州天平山白雲寺五僧行山間得蘆一叢甚大摘而煮食之至夜發吐三人急採鴛鴦草生啖遂愈。三人不甚肯啖吐至死。此草藤蔓而生對開黃白花傍水依山處皆有之。治癰疽腫毒尤妙。或服或傳皆可。今人謂之金銀花。又曰老翁鬚。本草名為忍冬。並出已志

中鱸鼈蝦蟇毒

頃有一士人好食鱸魚及鼈與蝦蟇。嘗云此三物不可殺。大者有毒殺人。蝦蟇小者亦令人小便秘。臍下絞疼。有至死者。宜以生豉一大合投新汲水半碗浸令豉水濃頓服之。即差。出茅亭客話

中豆腐毒

人有好食豆腐。因中其毒。醫治不效。偶更醫至中途適見做豆腐人家。夫婦相爭。因詰問之。曰。今早做豆腐。妻誤將蘿蔔湯置腐鍋中。今豆腐更就不成。豆腐畏蘿蔔也。醫得其說。至病家。凡用湯使率以蘿蔔煎湯。或調或噉。病者遂愈。

諸果有毒

諸果有毒。桃杏雙仁有毒。五月食未成核果令人發癰疽瘡。及寒熱。又秋夏果落地為惡蟲緣食之。令人患漏。桃花食之令人患淋。李仁不可和鷄子食。患內結不消。出本草衍義

中斑鳩毒



游大王夫人忽一日面上生黑斑數點日久面俱  
黑。遍求醫治不效。忽遇一草澤醫云。夫人中食毒  
爾。其治之一月平復。後覓其方。止用生薑一斤切  
碎。研汁將粗焙乾。却用薑汁煮糊為丸。問其故云。  
夫人日食斑鳩。蓋此物日常食半夏苗。是以中其  
毒。故用薑以解之。出名醫錄

○中蜈蚣毒

有中蜈蚣毒者。以烏鷄屎調塗咬處。大蒜塗之亦  
效。又畏蛞蝓。不敢過所行之路。觸其身即蜈蚣死。  
故取以治蜈蚣毒。桑汁白鹽塗亦效。出本草衍義

○藥反中毒

治諸藥相反中毒。用蠶退燒灰細研。一錢冷水調

下頻服。取效。雖面青脉絕。腹脹吐血。服之即活。

○中魚毒

虞侍郎蘇州人。平生喜食生魚鱠。中年病腹堅。倒  
身不得。每發痛疼。幾死累治不效。一善醫切脉曰。  
侍郎右關脉伏。為積聚。有生冷之積。成癥在腹。則  
疼不可忍。可以藥取之。令用橄欖汁吞九子藥數  
粒。晚下利一盆許。是魚鱠縷前一截。皆成魚矣。從  
此遂安。出名醫錄

○中蒿菜毒

王莽求云。蒿菜出尚國有毒。百蟲不敢近。蛇虺過  
其下。誤觸之則目瞑不見物。人有中其毒者。唯生  
薑汁解之。

○魚枕遇蟲毒

南海魚有石頭者蓋魚枕也。求其石治以為器可載飲食如遇蟲毒器必暴裂其效甚著。福唐人製作尤精人但玩其色而鮮能識其用上。

○中酒毒

飲酒中毒經日不省者用黑豆一升煮取汁溫服一小盞不過三服即愈。今人記之中酒是也。出服食反

○天蛇毒

太子中允關杞曾提舉廣南西路常平倉行部嘗管一吏人為蟲所毒舉身潰爛有一醫言能治使視之曰此為天蛇所螫疾已深不可為也乃以藥

傳其瘡有腫起處以鉗拔之有物如蛇凡取十餘條而疾不起。又予家祖塋在錢塘西溪嘗有一田家子病癩通身潰爛號呼欲絕西溪寺僧識之曰此天蛇毒爾非癩也。取木皮煮飲一斗許令其恣飲初日疾減半兩三日頓愈。驗其木乃今之秦皮也。然不知天蛇何物。或云草間黃花蜘蛛是也。人遭其螫仍為露水所濡乃成此疾。露涉者亦當戒也。出筆談

○中挑生毒

興紀入陳可大知聲慶府肋下忽腫起如癰生瘡狀頃刻間其大如盃識者云此中挑生毒也。候五更以菘荳細嚼試若香甜則是已而果然乃擣川

升麻為細末取冷熱水調二大盞連服之遂調下  
瀉出生葱數莖根鬚皆具腫即消縮煎平胃散調  
補旦食白粥亦無它又雷州民康財妻為蠱巫林  
公榮用挑生值商人楊一者善醫療與藥服之纔  
食頃吐積肉一塊剖開筋膜中有生肉存已成鷄  
形頭尾喙翅悉肖似康訴于州州捕林置獄而呼  
楊生診其疾證用藥其略云凡喫魚肉瓜菜湯蒜  
皆可挑初中毒覺胃腹稍痛明日漸加攪刺滿十  
日則物生能動騰上則胃痛沉下則腹痛積以瘦  
瘁此其候也。在上膈則取之其法用熱茶一甌投  
膽礬半錢於中候礬化盡通口呷服良久以鷄翎  
探喉中即吐出毒物在下膈即瀉之以米飲下鬱

釜末二錢毒即瀉下乃擇人參白朮各半兩碾末  
用無灰酒半鍾納瓶內慢火熬半日許度酒熱取  
溫溫服之日一盞五日乃止然後飲酒如其故丁

○誤飲蛇交水

陳齋郎湖州安吉人。因步春渴掬澗水兩口燕之  
數日覺心腹微痛日久疼甚服藥無效醫診之云  
心脾受毒今心脉損甚齋郎答云去年春渴飲澗  
水得此醫云齋郎喫却蛇交水蛇在澗邊遺下不  
淨在澗水內蛇已成形在齋郎腹中食其心而痛  
也遂以水調雄黃服之果下赤蛇數條皆能走也

出名醫錄

○中蜘蛛毒

治蜘蛛咬一身生絲羊乳一物飲之貞元十年崔  
真外從質云耳擊有人被蜘蛛咬腹大如孕婦其  
家弃之乞食於道有僧遇之教飲羊乳未幾日而  
平

○中山鷓鴣毒

南唐相馮延巳苦腦中痛累日不減太醫令某廷

紹密詰厨人曰相公平日嗜何等物對曰多食山

鷓鴣。延紹曰吾得之矣。投以甘草湯而愈。蓋山

鷓鴣皆食烏頭半夏。故以此解其毒。

○石斑魚子毒

誤喫石斑魚子吐不止者取魚尾草研汁服少許

立止

魚尾草又名糖木根形似黃荊八月間開紫  
花成穗葉似水楊非大柳經冬不凋漁人用  
以藥

○地漿治菌毒

四明溫台間山谷多生菌然種類不一食之間有  
中毒往往至殺人者蓋蛇毒氣所薰蒸也。有僧教  
掘地以冷水攪之令濁少頃取飲皆得全活。此方  
是本草陶隱居注謂之地漿亦治楓樹菌食之笑  
不止。俗言食菌者居山間不可不知此法。

○解毒

解毒蠱毒呪并方

頃有朝官與一高僧西遊道由歸峽程頓荒遠日  
過中餒甚抵小村舍聞其家畜蠱而勢必就食去

住未判。僧曰：吾有神呪，可無憂也。食至，僧閉目誦念。俄見小蜘蛛走綠盃，吻僧曰：速殺之。於是竟食無所損。其呪曰：姑蘇啄磨耶啄。吾知蠱毒生四角。父是穹窿男，母是舍耶女。眷屬百千萬，吾今悉知汝。摩訶薩訶。是時同行者競傳其本所至無恙。別傳解毒方：用豆豉七粒，巴豆去皮二粒，入百草霜一處，研細滴水丸。菴荳大以茅香湯吞下七丸。及泉州一僧治金蠶蠱毒，云：纔覺中毒，先吮白礬味甘而不澁，次嚼黑豆不腥者是也。但取石榴根煎汁飲之，即吐出活蠱，無不立愈。本暇云：以白礬茶芽搗為細末，冷水服。凡一切毒皆可治。併載于此，以貽後人。出產志

○解毒

凡人誤服生砒，唯單飲生油以吐為度，則其毒氣自消，不能為害。

○治蠱毒

嘉祐中，范吏部道為福州守，日揭一方於石云：凡中蠱毒，無論年代遠近，但煮一鷄卵，挿銀釵於內，併吞之，約一食頃，取視釵卵，俱黑即中毒也。其方用五倍子、硫黃末一錢，甘草三寸，一半炮出火毒，一半生丁香、木香、麝香各十文，輕粉三文，糯米二十粒，共八味餅內，水十分煎取七候，藥面生皺皮為熟，絹濾去粗，通口服。病人平正仰卧，令頭高，覺腹中省物衝心者，三即不得動。若出以盆桶盛之。

如魚鱠之類。乃是惡物吐罷飲茶一盞。瀉亦無妨。旋煮白粥補。忌生冷油膩。鮓醬十日。後服解毒丸。三兩丸。經旬平復。丁木麝。三香。蓋嘉祐中。十文。今數倍。乃可爾。出類編

○解毒藥

王仲禮嗜酒壯歲時瘡瘡發於鼻延于頰。心甚惡之。服藥勿效。一僧使服何首烏丸。當用二斤。適有僕識草藥及搗得之。其法忌鐵器。但入沙鉢中。藉黑豆蒸熟。既成香味可人。念所蒸水必能去風。澄以頰面。初覺極熱。漸加不仁。至晚大腫。眉目耳鼻。渾然無別。望之者莫不驚畏。主之母高氏曰。凡人感風癩。非一日積。吾兒遇毒何至。於是吾聞生薑汁赤小豆能解毒。山豆根黑蚌粉能消腫。亟命僕搗薑汁以三味為末。調傅之。中夜腫退。到曉如初。蓋先採何首烏擇烏不精為狼毒雜其中。以致此撓也。

○解毒

凡中藥毒及一切諸毒。從酒得者難治。言酒性行諸血脉。流遍身體也。因食得者易治。言食與藥俱入於胃。胃能容雜毒。又逐大便泄出毒氣。毒氣未流於血脉。故易愈也。解毒食毒爛嚼生甘草。嚙之則毒吐出。出類編碎錄

○蟹解毒

乾道五年襄陽有劫盜當死。而特旨貸命。黥配者。

州牧慮其復為入害既受刑又以生漆塗其兩眼  
囚行至荆門已盲不見物寄禁長林縣獄以待傳  
送適有村叟以事在獄中憐而語之曰汝明日去  
時倩防送者往蒙泉尋石蟹搗碎之濾汁滴眼內  
漆當隨眼汁流散瘡亦愈矣如其言訪得一小蟹  
用之留三日而行目睛如初略無少損予妹婿朱  
晞顏時以當陽尉攝邑令親見之出丙志

○獸能解藥毒

名醫言虎中藥箭食清泥野豬中藥箭逐薺苳而  
食雉被鷹傷以地黃葉貼之又礬可以害鼠張鷟  
曾試之鼠中如醉亦不識人知取泥汁飲之須臾  
平復鳥獸蟲物猶知解毒何況人乎被矢中者以

甲蟲末傳之

○蛛為蜂螫

處士劉易隱居玉屋山嘗於齋中見一大蜂罹于  
蛛網蛛搏之為蜂所螫墜地俄頃蛛腹鼓裂徐徐  
行入草嚙芋梗微破以瘡就嚙處磨之良久腹漸  
消輕躁如故自後人有為蜂螫者按芋梗傳之而  
愈

○保靈丹

往時川蜀俗喜行毒而成都故事歲以天中重陽  
時開大慈寺多聚人物出百貨其間號名藥者於  
是有於窻隙間呼貨藥一聲識其意亟投以千錢  
乃從窻隙度藥一粒號解毒丸或一粒可救一人

命夫迹既叵測故時多疑出於神仙政和間祐陵  
以仁聖惠天下嘗即上清寶籙宮之前新作兩亭  
左曰仁濟主給藥治疾苦右曰輔正主符水除邪  
鬼因遂詔海內凡藥之治病彰彰有聲者悉索其  
方書而上之焉於是成都守臣監司奉命相共窮  
其狀乃得售解毒丸藥世世懼行毒者為讎害故  
匿其迹非有所謂神仙者既擬方脩治得其合即  
并藥奏御下殿中省上曰朕自弛矢手所服御以  
濟元元毋煩有司也繇是殿中省羣醫諸師驗其  
方則王氏傳之乃保靈丹爾當是時猶子行適領  
殿中監事故獨得其詳吾落南來用是藥嘗救兩  
人食胡蔓草毒得不死蓋不可不書

出百衲居士  
鐵圍山叢談

醫說卷第六





